

四庫全書

集部

欽定四庫全書

集部
明詩綜卷六十二

詳校官中書

臣

涂日煥

主事銜

臣徐以坤覆勘

總校官降調編修

臣

倉聖脉

校對官庶吉士

臣

潘曾起

謄錄監生

臣

楊恪

欽定四庫全書

明詩綜卷六十一

翰林院檢討朱彝尊編

區大相 四十八首

大相字用孺高明人萬厯己丑進士改庶吉士
授檢討歷贊善中允有海目先生集

靜志居詩話海目持律既嚴鑄詞必鍊其五言
近體上自初唐四傑下至大厯十子無所不仿
亦無所不合嶺南山川之秀鍾此國琛非特白
金水銀丹砂石英已也又云海目五言律詩如

純鈎初出拂鐘無聲切玉如泥又如銑吹平江
秋空清響顧近人選詩置而不錄予特為表出
取之稍
溢焉

定朝鮮

皇赫怒命東征千翼舉七萃行渡綠江援王京鼇足斷
海波平扶桑拂暘谷升旭日中仰大明一解戮羣倭定朝

鮮武功振文德宣橐弓矢戢戈鋌藩服固王會全祥瑞
降諸福駢祝聖壽萬斯年二解

青樓曲

新鶯囀畫堂新燕集雕梁柳葉裁眉出桃花學面妝珠
簾映日卷錦袖隨風揚大道連平樂高樓接建章容華
艷陽月夫壻侍中郎挾瑟調鸚鵡將簫待鳳皇朝回欲
有問軒騎滿東方

淮浦吟

淹泊清淮浦悵望丹水涯狂風吹我舟不得早還家
征夫念閨人非為顏色好游子戀故鄉非關萬里道

解一

月夜花下小酌和友人

解二

碧空散微雲孤月照遠客以君衣上光鑒我花間席傾
壺逐夜涼隔林望歸翻槭槭葉墮階淒淒風入隙清光
正娛人徘徊戀終夕

紀朝鮮事

萬曆戊戌九月

自有東師六七載廟堂歲歲議封貢近者羣公幸主戰
折將隳軍竟何用海闊芻糧不易渡五鍾一石勞傳送
橫征頗慮空杼軸轉輸未免妨耕種去年小挫由忌功
今年大衄緣輕縱執事頗行屢見逆天王威命何曾共

封既無成戰失利公私之積咸哀痛更無一人能畫策
徒有諸僚成聚訟要荒交侵古來有更於中國何輕重
當時止合問曲直接兵境上不為動朝廷制馭自有道
豈在勞民與動衆奈何誤聽小人計日以和好自愚弄
從此兵端尋歲月豈知海內為虛空財傾左藏不足惜
民傷萬命能無慟近聞有議留屯戍老成億度或屢中
充國金城上方略李牧鴈門費邊供年來喪敗咎北軍
弓馬雖嫻備騎從吳越少年習水戰檣械輕利過飛鞚

儻能訓練三萬人坐見驂騑受羈控腐儒何敢與肉食
聊以短章代微諷繞朝勿謂秦無策中興尚看甫作頌

過韶石

玉輦南巡日從天降九韶仍聞舞百獸真想格三苗風
雨仙靈集雲霞絳節朝有時盤石上天籟暮蕭蕭

別汪和叔之塞上

花前各盡觴游子賦河梁我望南枝返君同北雁翔笳
聲咽隴底海色愁漁陽未共酬恩去相思塞草長

夏日同諸客泛舟青溪

二首

錦席人須醉仙舟客共登年華各自惜意氣轉相矜
瓶水沉朱李溪花覆紫菱莫誇姑射雪吾有玉壺冰
卷幔千花暝回舟一水遙芳情瑤瑟怨別曲鳳笙調
桂苑通仙閣蘭房接畫橋倚歌待明月長笛不須邀

金陵城南宴

逸客東山至佳人南國多袖飛金谷舞梁繞石城歌
妝閣宜春入花蹊愛晚過留懽方待月無遽動鳴珂

入羅洿水

井邑新安集閭閻雜漢徭火耕春伐木山獵夜歸樵潮
響蠻溪合林光瘴峒消直須勤撫字慎勿困徵徭

曲江值雪

急雪孤城下同雲萬里長客情猶故國春色漸他鄉冷
氣開炎嶠流光艷早陽紛紛何所擬諸謝有歌章

客中九日

細雨黃花節秋風竹葉杯異鄉誰送酒何處更登臺木

落江雲暮天寒塞鴈來惟憐三徑在歸去翦蒿萊

早春長安道上

雙闕麗朝霞千門競歲華苑雲微帶雪宮柳半藏鴉結
駟過平樂揚鞭赴狹斜春風纔幾日先發上林花

九日偕館中諸友集天寧寺

帝京重九日朋舊共開尊地遠城西寺臺高薊北門雲
光移塔影山勢斷河源忽覩南征鴈令余思故園

家人初至京置酒亭中對雪作

庭霰今朝集家筵此日開不知燕地雪猶訝故園梅玉
袖承花出珠簾卷絮迴瑤華雖可贈留賞上春來

送胡孟弢之沅江

豫章人時
疏論邊事

浮湘明日事江畔暮行吟易動騷人怨難為國士心秋
風吹芷岸落日滿楓林知有還家夢潯陽九派深

送薛行人持詔南楚便歸嶺外

邊事勞行役秋冬兩戒輶方回遼左使復作楚南游雪
樹江關驛雲帆海國樓仍聞下詔日父老共銷憂

送張僕卿還桂林

還朝能幾日去國逼殘年
別路春前酒離亭雪後天
衡陽隨雁去湘浦問歸船
未是投閒日東山卧莫堅

登來青軒

層軒翠微裏宸翰此高題
仰見星辰列平看雲霧低
路盤陵樹北山擁帝城西
萬乘來遊地應無七聖迷

癸巳九日同焦太史攜酒興德寺後池臺

杖屨侵霜葉壺觴就徑花
高風疎薜荔薄霧隱蒹葭
山

遠層城暮橋通小苑斜正逢邊鴈下西北有塵沙

寄梁兵憲天津

碣石橫燕甸天津控海門梯航萬國會貔虎五營屯
遠浪含夷島長沙接塞垣人傳新節制清嘯似劉琨

昌平道中

山家未夕昏半已掩柴門車馬爭塗疾牛羊下坂喧
春陰入陵樹雨色過湖村誰道相如病猶堪守漢園

朝陵遇雨

言避峻陵雨翻行大壑雲微風清樹氣積潤洗山文銀
海春波闊龍池細澗分九陵松柏路香靄日氤氲

供事長陵

二首

文皇鼎成後此地葬衣冠日月神宮閔山河帝寢安塞
雲疑扈蹕關塞想回鑾寂寞犁庭事深知創業難

弓劍思軒后山川會禹陵翠旗何日返龍馭幾時升寢
殿行春草幽宮寂夜燈萬年關路北神武至今稱

游宗謙老年出塞壯之

嗟君垂老日策馬薊門東
易酒顏猶壯燕歌氣尚雄
敝裘經積雪頽鬢逐秋蓬
寄謝行間客無輕塞上翁

送何儀部稚孝謫桂林

長沙非不遠南去更蕭森
謫宦楚山盡獨行湘水深
鄉書同鴈少官舍共猿吟
今夕懷人夢隨君到桂林

出錢塘門覽古作

駐馬錢塘路逢人說勝遊
湖光吳苑晚山色宋陵秋
巖桂密連寺渚花高映樓
傷心六橋月不照汴河洲

晚霽玉峽驛望玉笥山

峽束江流窄山欹堞影低玉梁沉宿霧金澗落晴霓水
鳥窺魚下林猿摘果啼靈峰不可到矯首問丹梯

謁張文獻祠

一代孤忠在千秋大雅存詩才推正始相業憶開元曝
日陳金鑑蒙塵想劍門更吟羽扇賦搖奪不堪論

秋日還山

村邊黃葉路溪上白雲岑草屋山家淺松門野寺深羣

魚依密藻獨鶴返高林若問還山事多應負此心

浮丘洞中宴

洞府游仙入樓臺望氣通焚香來桂女行酒命芝童鶴
舞春池月鶯啼碧樹風何當倚長袖共挹浮丘公

晚發三水溯北江

行客纔經宿離愁已不堪郵亭數長短江路背西南里
樹春烟斷山城夕照含何時已行役歸結桂松菴

於曲江逢高正甫奉使南還

相逢一杯酒與子暫綢繆以我北來信附君南下舟鄉
心滄海上客淚曲江頭為問乘槎使何時到廣州

東林寺

昔讀高僧傳兼懷逸士蹤停車虎溪水對面香爐峰舊
殿丹青落荒池蔓草茸我來松下坐日暮但聞鐘

送混成子

夫子富道術世人無不聞徒聞不能用長嘯空青雲丹
麓烟霞記玉鈴龍虎文西山有鸞鶴應共爾為羣

秋鴈

秋風度玉塞候鴈發金微纔共邊塵起還同關葉飛排
雲聲漸衆帶月影全稀徙倚東南望江皋何處歸

中秋望月簡董玄宰太史

月滿層城上秋分御苑中玉樓寒自迴珠箔照還空望
美今宵隔含情幾處同此時折桂客或在明光宮

夜坐

夜坐不覺久庭烏棲復啼燈前下黃葉井上鳴莎雞漏

靜風聲細帷空月影低城南有思婦幽夢越遼西

寒日

霜林無一葉寒日復多風碩果猶存否危巢本易空
誅求三戶盡杼軸萬方同白石南山曲悲歌夜未終

大科峰是西樵絕頂

登高四望開絕頂出瑤臺遠岫一方缺長江數道來
雲間下鸞鶴天上埽莓苔高揖烟霞外三山何處哉

厓門弔古

遺恨前朝事
吾來問水濱
乾坤存一旅
社稷有三臣
慘澹勤王志
間關護主身
至今厓畔石
風雨洗凝塵

京師苦雨作

入夏多靈雨
經秋未肯晴
直須憂地陷
無計補天傾
方割傷民瘼
其咨軫帝情
古來堯命禹
天地乃平成

潘子明光祿解官南歸

故人官不達
久欲賦閒居
忽見秋風起
翻然思舊廬
寧貪數升醞
定憶四腮魚
前路多歸興
江天鴻鴈初

南行感懷

聞道貂璫輩由來為婦除先朝停鎮守舊日典方輿
採山川竭徵輸井邑虛明明皇祖訓宮府意何如

端溪雜詠

夕陽下前山山光落溪水歟乃時一聞只在山光裏

望七星巖

仙山對城郭累累七星石中有太古文世人了不識

鄭明選

四十六首

明選字侯升歸安人萬厯己丑進士除安仁知

縣擢南京刑科給事中有鳴缶集

朱平涵云先生詩不施鉛

粉不事雕鐫一東

於雅澹然成趣

詩話先生五言近體全學高遠夫七言近體全學杜子美語不求工而句鉅字鍊卓然名家是時汪伯玉劉子威馮元成屠緯真輩類守其聲穀而遺其神明其在西吳徐子與吳峻伯皆然先生之詩遂無人賞激者

感懷

黃虞世已遠大道漸陵遲十室八九空姦邪乃猖披法

今日以繁盜賊日以滋宣尼相魯國道路不拾遺君子
正其本禮義將自治莫以鞭與轡能使疲馬馳莫以刑
與戮能使風俗移長吏苟有關三尺將安施

短歌行示徐秀才正公嚴從事稚荆

九月豆葉黃十月菊花槁朔風一何寒清霜凋百草時
物頓如此人生亦以老憂日常苦多歡日常苦少攬鏡
令人悲朱顏非昔好

過東阿山寄鄒大

東阿之山石散亂大者如席小如彈大石如席尚可行
小石縱橫馬流汗青馬玄黃白馬飢長鞭策馬馬更遲
行人日短心欲碎山石紛紛無盡時故人昔共山中路
犯雪蒙霜凡幾度君今哭父且南留我獨朝天仍北去
東阿山頭首重迴東阿山外使人哀玄雲不飛日氣薄
蕭蕭草白三歸臺

與楊二叔純

許子南昌去王孫嶧縣遊舊交如雨散春水滿城流不

見江邊閣徒懷雪裏舟故鄉惟汝在莫惜屢相求

雪不止復作

大路倉橋口貧家雪水灣寒雲常滿郭春雪不離山夾
雨琤琤下隨風款款還逡巡小僮僕擁袖出柴關

初冬

數日風纔罷初冬水始冰門寒朝嬾出山近午還登密
竹藏斑雉枯松下黑鷹千村穡事早生計稍堪憑

暫移山居

春晚營蠶事移居郭外村白花低覆水翠竹遠侵門拂
几開殘帙攜鉏理廢園鄰人儻相訪薄與酌清尊

恭閱天壇

圓丘圓殿外清晝日沉沉玉陛春沙煖瑤壇古樹深太
微瞻帝座大享見王心想像鈞天曲輕風落妙音

十五夜寫懷

明月孤懸夜空齋獨坐人地平連海嶽天闊散星辰祿
米悲親沒柴門憶弟貧吾生無限事況感百年身

野望懷王時立朱大復

驛外晴江白洲前夏木青
過橋風細細立馬水泠泠
岸柳鳴鵲鵲汀花卧鵲鵲
歌成也自愛難得故人聽

邳州晚泊

日落留侯廟春深呂布城
殘花晴抱蝶細柳暗啼鶯
漸集河船密遙生野燒明
客愁無可慰膝上一經橫

客至

萬里清秋水孤城薄暮雷
故人江上至涼氣雨中来
吳

粵分離久風塵老病催猶餘十年釀今日為君開

傷春

野漲村村水山城日日風雨深荒縣裏春盡訟庭中朋
輩他鄉異鶯花往歲同牀頭十年酒未有一尊空

官舍晚酌

百里山圍縣雙江水對門日斜初解帶秋爽一開樽家
遠思親舊官貧任子孫醉看青竹淨纖月照黃昏

過汶上縣

汶上齊封近蒙山魯望尊寒城初出縣落木更逢村冰
黑經旬合沙黃萬里昏茫茫人獨去日暮欲銷魂

陽穀夜步

清夜一孤客寒燈強半時露垂陽穀樹月傍太山祠魯
酒沽長薄燕歌聽自悲茅堂卧不穩散步獨遲遲

鄭州即事

滿目皆湖水家家傍水居地貧村少米水闊市無魚樹
入天雄小雲飄逐鹿虛風塵半萬里消息故鄉疎

春日愁生

寺古山門靜春深野日遲
晴沙浮宿麥小徑舞游絲
西蜀軍書急東倭廟算疑
禁中應獨歎難得外臣知

燕子磯宴羅諫議

投老登臨健平生故舊來
共騎沙苑馬一泛竹林杯
雪暗山雲重江喧石壁開
吏人歸亦嬾閒看暮潮回

望鍾山

鍾山望不極終日紫氤氲
宿雪雙峰出春沙八水分
龍

蟠思霸主鶴怨想徵君縹緲園陵外松楸起白雲

遊獻花巖

融公昔悟道留此獻花巖野寺人初識山花鳥舊銜洞
門無日月石縫有松杉東北清江闊徵茫萬里帆

金川門志感

靖難興師日天戈向此門乘輿何處去宮闕到今存
哀冤新君盛旌旗叔父尊當時漢官屬幾輩泣皇孫

拜方孝孺先生墓

隔世祠初建荒山冢僅存薦蘋惟我輩收骨豈兒孫祇
覺丹心苦寧辭赤族冤精靈江月裏長到孝陵園

朝天宮登白鶴樓

紫府深通逕丹梯半入雲樓飛三百尺門鎖五千文郭
外吳山盡牕中楚樹分游仙今夜夢親謁武夷君

送何比部告滿之京

貫酒石城門送君花外村曉風飛海燕春水上河豚滿
秩稱能吏趨朝報至尊萬方堪涕淚別後向誰論

清明日上孝陵

夏后藏書穴軒皇鑄鼎湖人間留石獸地下想金鳧谷
暗春泉響松高曉月孤江山滿目在萬古見黃圖

閱城

萬雉金墉壯三江玉浦通天迴青嶂外日轉碧雲東古
木盤秦水春花簇漢宮偏安四十帝未有聖朝雄

燕子磯即事

突兀磯頭寺蒼茫野水村凍雲垂日氣斷石落潮痕法

金定四庫全書
卷六十一
曲新翻譜香醪屢換樽山僧遙指點風信有江豚

病中憶新種竹示家童

南牆新種竹今有幾竿存移石容抽筍通渠好灌根
病中思拄杖健日想開樽但放高人看來時莫掩門

通上人見訪夜坐

市罷寒溪靜城昏夜霧交高僧扶竹杖落日到蓬茅
風栗開丹殼霜橙破紫苞清談對支遁明月度松梢

幽趣

但見滄洲趣清溪對竹扉
牕陰懸薜荔水色受薔薇
邨鴨迎船浴山蟲冒雨飛
田家蠶已老日暮翦桑歸

恭聞冊立皇太子喜而賦詩

少海初流潤前星已麗空
九重元獨斷四皓本非功
鶴馭丹霄上龍樓紫禁東
君王有金鑒早晚賜春宮

峴山宴陳太常

七月峴山天氣涼風亭乍雨
湖茫茫輕舟出浪若飛瓦
巨石滿岡如聚羊斗酒未覺
主人薄高歌正宜秋日長

窪樽遺蹟至今在不見昔賢空斷腸

宿濟寧南關潘中丞具舟見送兼留夜酌

濟州城外風氣涼汶泗之水東流長孤州白鳥背人發
十月黃花滿店香中丞為我具舟楫薄暮遣吏延壺觴
明朝遠道一回首太白樓高烟樹蒼

上渡即事

上渡人家生午烟青絲絡馬寺門前纖纖杜若風香細
翦翦梭欄日影圓疊嶺遙來彭澤鴈晴江爭落信州船

村中父老知農候拄杖南疇課種田

經黃葉嶺

黃葉嶺邊黃葉飛江風蕭颯吹我衣
清秋塞北斷鴻去落日馬上行人歸
百年回首已衰白萬事傷心今是非
一望長安一惆悵無人知道寸心違

至日

今日何日日初長所思何思思建康
朝天鳴玉已往事對水看雲仍故鄉
萬里淒風埽落木中宵陰壑生清霜

可憐物色歲云晏白首高歌空斷腸

中夜枕上口號

東溪先生雪半顛樽中酒盡挑燈眠誰家月下尚鳴杵
隔水夜深頻喚喚船清時幸許著棄物薄產聊足供殘年
明朝料理登臨事去看青山瀑布泉

春日嚴稚荆邀游蘇灣

桃花李花二月時反接兩手登山遲一湖春水泛漁艇
終日野禽啼竹枝石嶺張筵坐無次邛童喜客行相隨

不見前朝蘇學士風流千載使人思

上永陵

肇聖清河水興王自郢都三為代邸讓一握漢家符社稷承堯服乾坤定禹謨神功九葉盛大禮百王殊紫氣真人散丹砂術士誣石扉藏玉虎銀海浴金鳧二女悲湘水羣臣望鼎湖地環滄海閣山擁薊門紆王氣真蔥鬱精靈歟有無中官供寢薦七萃護雄圖願錫皇孫福長聞萬歲呼

獻縣懷古

漢代賢王子風流獻縣存遺書千載散雅樂幾人論墓
道松楸古祠堂俎豆尊故宮迷草色殘碣鎖苔痕鴈鶩
浮河水風沙暗郭門行行一回首烟月度黃昏

寄朱比部二十韻

未補馮唐署能陳鼎錯書氣高憂國日名重罷官餘北
闕承新譴南山返故廬直詞元忼慨時論共咨且請劒
心徒憤埋輪事已虛何人招隱士未老賦閒居落日菰

城卧秋天震澤漁遠遊常有興多病近何如以我叨青
瑣分曹傍石渠恩深蒙茹納才薄負吹噓廊廟多旁午
閭閻異古初聖謨殊奧窔小智獨躊躇昧死思劉向偷
生謝史魚妻孥霑雨露歲月費居諸託宦身何用遊仙
夢久踈初心今已矣晚計欲歸與彭澤教栽柳於陵學
灌蔬清齋心不染導氣髮常梳廢馬雖思主山猿恐怨
予如君終奮發不作楚三閭

寄祝諫議

尚憶陪青瑣相隨寓白門馬蹄偕出入鷺序接晨昏諫
疏分封署文章共討論晚尋桃葉渡春酌謝公墩李杜
名虛竝雷陳義久敦風塵身汨汨霜露疾惛惛二豎心
難惻三彭口莫捫乞骸元我志歸骨乃君恩伏枕安時
命居家玩子孫小童春藥杵故舊捧匏樽野意頻栽樹
山歌日扣盆鶯啼藏竹塢犬吠出花村守拙心無用逃
名道豈尊老人應世棄王事獨君存畫省兼羣職銅章
領六垣別離經歲月書信隔寒溫天地堪搔首江湖屢

斷魂中官仍虎視西賊且鯨吞內府招桑孔前星望綺
園舜琴須解慍堯鼓為求言巖穴已枯槁雲霄常奮翻
批鱗終不怒張膽莫辭煩氣激憂丹宸詞危叫紫閣回
天諒有力拭目在丘樊

早行

雞鳴客下牀出門天未曙山黑不見人但聞馬蹄去

新江營對雨

漠漠江雲生江天雨如霧東望白鷺洲蒼茫不知處

憶吳興

衢州霜橘紫金苞
玉液瓊漿不用調
此物遠來三百里
香風散滿駝駝橋

王士騏 三首

士騏字罔伯太倉州人尚書世貞子萬曆壬午
鄉試第一己丑進士由禮部主事調吏部員外
郎坐妖書獄削籍有醉花菴詩選

詩話罔伯醉花菴

詩不拾過庭片語

贈別

東風吹柳柳成絲
細雨釀花花滿枝
可惜春光正駘蕩
相逢恰是別離時

送顧太史使朝鮮

徹天火樹照邊陲
軟繡肩輿坐自移
到日定知春麥秀
請看箕子廟前碑

明妃怨

秋來無事不消魂
幾度貂裘換淚痕
却憶天家全盛事

少年公主嫁烏孫

歸子慕

十九首

子慕字季思崑山人萬歷辛卯舉人崇禎初追

贈翰林待詔有陶菴集

沈山子云古今效陶而肖者王韋之外不得不

推季思

詩話季思善病再試南宮歸而屏跡田里所居陶菴插槿為牆縛茅為屋小如蝸殼瓠子養疴其中迭相往還講學者無錫高攀龍存之嘉善吳志遠子住主客從容晏坐默識凝然不語一有所得輒怡悅相告存之稱其有絕人之慧絕人之識絕人之趣又言季思出諸口者不漫作

無味語筆諸書者不漫作無味辭措諸躬者不漫作無味事即其若字蠶笑足以洗濯一世塵垢傾倒可云至矣季思雖病猶授生徒友人勸其輟講報之書云生徒因無累於我豈惟無累且以為樂清晝飯餘滄江日落或童或冠油油與偕共坐槐陰間譚吸茗臨江藉草以觀雲物風帆往來於目農歌不輟於耳亦可謂主樂矣君子謂其樂天知命焉季思卒時年四十有四崇禎下詔特贈翰林待詔其詩學陶而得其神髓韋蘇州後鮮有其倫誦之令人增陋巷簞瓢之樂

丙申六月過吳子往荻秋菴

蕭瑟湖上廬六月如清秋涼雨過柴門綠楊風颼颼水

濱一穉子洋洋何所求終日無一魚持竿釣不休問之
向我笑使我心忘憂

歲暮別諸生

惻惻不可道臨歧但依依常恐語言多貌勝中情微感
茲寒色厲北風吹爾衣歲暮室家好各各念爾歸羣居
雖云樂人情理難違所患不同心不患相見稀尼父重
久要如醴久已非勗哉儀先民雅道庶可幾

感悟

人人惜富貴富貴諒難私居位食其食抱關有攸司若
懷凍餒憂不如農桑宜平心任公道天下能者為人事
當前昏事後更相嗤三十五年前歷歷皆可思以此徵
後來何勞復多疑願言謝將迎履坦希前知

館城北

妻孥昔居城我淹江上廬妻孥來江上我去城北居城
北何所事二生喜從余既愛童子真且得人事疎長夏
北牕竹風吹几上書坐看牆外帆樹中去徐徐中情苟

無繫觸物皆有餘今茲對佳節秋風秋月初香稻感我
鼻歸食江上魚小女解思父一見當何如

歸江上

去年冬盡歸室家尚完好兒女曝簷隈牆頭日杲杲今
年冬盡歸離憂不可道中饋闕無人虛堂塵不埽一兒
依外家兩女歸兄嫂奚獨天運乖謀生亦草草人世骨
肉緣尚爾不可保而況一切營何足櫻懷抱久矣吾行
迷回車苦不早

城北初夏

三見草木榮
樓樓猶未旋
偶與城市遠
因耽此地偏
獨館背清池
一無俗事牽
晨興課書罷
日午蛙聲喧
出門見新秧
微綠映遠田
久晴初得雨
穉子亦欣然
田父說歲占
今茲定有年
物情既如此
予樂復何言

庚子正月吳子往見過同訪高存之於漆湖

令節思故人
流光懼蹉跎
心在隰桑篇
三復當如何
忽聞叩門聲
良友遠見過
攜吾訪同志
詰朝鼓輕舥
情殷

無遙路信宿踰關河依然漆湖上春山渺晴波主人愉
愉如薰以風日和風和卷簾坐開樽鳥來歌忘飲飲更
適不覺芳顏酡階前山茶花落英何其多

暮春

梅陰蔭西牕實錄枝葉低小鳥時來鳴向我如棲棲一
鳥鳴未已一鳥隨和之鳥聲處處起高下聲參差日出
聞鳥聲不覺日已西池塘小雨過夕陽鷓鴣啼

元德秀

吾愛元德秀天然真澹姿榮進非所好聊仕亦不辭於
彼紛華中連袂歌于蒿一日駕柴車欲去亦不疑惟盡
名利心長得情性怡飲酒彈鳴琴晷宇若見之悠悠千
載下寤寐勞相思

雜詩

日出羣動作智計千萬端用此徒為勞不用不自安所
繇在有身坐令思慮殫所以古賢達與物同一觀俛仰
任所之宇宙何其寬

冬日病樓新構小屋

天寒小屋宜潔靜兼新築短簷近低牕意親足我欲牕
邊兩木榻編秧煖於褥西榻朝食暄東榻晡時燠暄燠
既互轉盤旋與相逐藥物難長供日惟飽饘粥

壬寅正月西邨築室成

經始逼歲除春肇室云考結構稱心為彌拙亦彌好邨
樹既羅列溪流復縈抱北牖移修簷南圃藝藥草室中
圖與書閒暇可探討農人理耰耨念此歲供早顧我長

負疴不耕慚亦飽

寄姚孟長

道同不用結氣同不用求神在未交先彼此潛相投感
君嘒嘒志高廣正無儔慷慨燈前言奚止情綢繆男子
患無志有志良難酬懷居易隨俗安樂生煩憂可憐早
春役烟雨維揚舟不知何所牽行止不自由殷勤孟秋
約期屆無淹留

泛湖

離居久相思乍見人情喜各從遠方來相知若伊始晴
空泛秋湖天際水瀾瀾中流將焉如東西非所擬微風
送輕舟颯入蘆叢裏村家插新標有酒清且旨漁人近
前問銀魚初出水美物應佳節及時在我爾滌盞欣對
酌高情詎能已言旋發清歌夕陽下西溪童冠樂何如
點也千秋起

辛丑夏日閒居

閒居不勝娛何妨抱微疾長以無事心當彼攝生術白

日一何長臨牕坐捫蝨飯餘弄清琴卧起展殘帙孤雲
御微風翩翩獨高出

對客

嘿然對客坐竟坐無一語亦欲通殷勤尋思了無取好
言不關情諒非君所與坦懷兩相忘何害吾與汝

移居

冉冉歲云暮寒風動林於言辭東邨宅去適西邨廬豈
無舊巢戀歡與吾仲俱西邨况不遠相去一里餘回瞻

竹樹間炊烟出前厨吾病四十衰厭厭日不如憂患易
反本戚戚念友于安得我叔氏亦復來此居遙望城中
山引領空嗟吁

閒居寄沈伯和博士

時伯和將之
京應貢舉

蹇劣仍負疴分定無越想柴門槿葉疎卧看人來往江
南寒信遲十月氣和朗一夜好雨過階前菜甲長念我
遠行人中心悵養養盤餐有餘滋高駕何時往

北地曉征

夜半寒雞不忍聽主人炊熟夢初醒出門不復知南北
馬上持鞭數七星

張民表

二首

民表字林宗一字武仲中牟人萬曆辛卯舉人
有原圃塞菴詩集

詩話冠園大梁汴人死守不降有獻策高巡撫
名衡者曰賊營附大堤決河灌之盡為魚鼈矣
周王募民墾羊馬城高厚如岸援兵掘朱家砦
口賊黨覺之移營高岸多儲大航巨筏反決馬
家口以灌城河驟決聲震百里排城北門入穿
東南門出流入渦水渦忽高二丈士民溺死數

十萬林宗負其先祠木主登筏鄰人求登者衆
林宗不忍移筏就之筏且沈乃移筏登屋水大
至而沒久之門人周侍郎元亮為刊其遺集僅
存百一週存者悉非其稱意之作可惜也夫

飲酒示唐肯堂

飲酒非吾好逢君強共斟已聞譚世變悔不入山深猛
士功宜錄書生職宜任東南民力竭爭忍索黃金

閨門見別者代為吳歌

一船往東撥一船往西開兩船不相顧都看姑蘇臺

明詩綜卷六十一

欽定四庫全書

明詩綜卷六十二

翰林院檢討朱彝尊編

朱燮元 一首

燮元字懋和紹興山陰人萬厯壬辰進士除大理評事累官兵部尚書兼右都御史總督川湖雲貴加太師有恒岳遺橐

靜志居詩話太師儀表豐偉飲啖倍十餘人其蒞湖南川貴土司以壺漿乾肉迎車前相接於

道公傾桀倒甕一無留餘衆皆驚歎曰此人也相誠不敢出犯威既久威望著於西南北之蜀相諸葛云公詩不多作句如買得勞薪先煮酒不嫌疎鬢也簪花荒徼有誰憐白歌故園亦自有青山越人至今傳誦之

馬嵬坡

六龍回轡此重過遺恨秋墳掩韞羅南內蕭蕭風雨夜淒涼應比壽王多

畢自嚴一首

自嚴淄川人萬厯壬辰進士官戶部尚書

塗次詠桃花

綠楊春樹蔭芳鄰中有夭桃別樣新
馬上不煩頻指點好花應笑白頭人

李騰芳一首

騰芳字子實湘潭人萬曆壬辰進士官禮部尚書

博望驛

孤亭瞰虛空危闌翼石壁亭亭數株松
雲端發深碧起視羣巒層溪光亂相射
盤梯花倒看入閣煙相逼雨過

萬瓦鳴燈殘四邨夕疎星柳外明河漢看不隔去矣問
津人空思泛查客

劉一焜 二首

一焜字元丙南昌人萬厯壬辰進士除行人擢
吏部主事厯郎中升太常少卿巡撫浙江

清蹕

清蹕歸何晚刊山紀漢功猶餘玄石碣竟墮鼎湖弓社
稷三犁後園林百戰中如何膏血盡辛苦事來同

寄題金山寺

長江流日夜縹緲一峰殊
落景疑飛動盤根定有無
雲端清磬濕樹杪佛一作聖燈孤
幾見登臨客扁舟下五湖

張五典一首

五典字和衷沁水人萬曆壬辰進士授行人遷戶部主事歷員外郎中出為山東參議累遷大理卿加兵部尚書贈太子太保有海虹集

送喬傲我

長路天涯外驅車背朔風
三秋驚別鶴千里慕征鴻
尊酒荒城外關山落照中
前程行色晚表馬自匆匆

王愛一首

愛字仁甫宛平人

履歷注
任丘人

萬曆壬辰進士除潞

安推官入為戶部主事歷員外郎中升陝西參
政進右布政使有息機園存橐

繇山道中

昔賢棲隱地兩壁盡高山
入夏風應凜經春花未斑
烟

猶遺俗禁廟許妒人還

平定州孀子闕有妒女祠唐李諲作頌傳是介之推妹立

馬看唐碣神林不可攀

神林大樹腹中有郭令公碑禁樵采

蘇茂相

一首

茂相字弘家晉江人萬厯壬辰進士除戶部主事累官戶部左侍郎總督倉場尚書再加太子太傅改刑部尚書

弔方正學先生

寧海侯城里停車意愴然風雲蕭瑟氣天地革除年臣

罪單辭定孫枝一葉傳
龍山真突兀彷彿首陽巔

李本緯 一首

本緯字君章錦衣衛籍曲沃人萬厯壬辰進士
除鞏昌府推官仕至山東右布政使有灌蔬園
集

登張掖甘泉樓

乍別酒泉郡來登張掖樓
關雲排檻入塞水背城流
夜湧陂塘月寒生草樹秋
凭高聽不盡羌管數聲愁

石九奏一首

九奏字伯成冀州人萬厯壬辰進士授大理評事厯寺副寺正出知萊州府以憂歸補兗州升開原兵備副使進右參政

春郊

三月長安花正飛長河隄畔柳依依獨憐芳草王孫路立盡東風不肯歸

陳懿典一首

懿典字孟常秀水人萬厯壬辰進士改庶吉士
授編修厯少詹事有吏隱齋集

李公弼招飲柰子花下

淑景春城暮聯鑣韋曲來共尋金谷墅同泛竹林杯
縞夜分穠李生香喻早梅不愁風雨至只恐暝鐘催

吳士奇一首

士奇字無奇歙縣人萬厯壬辰進士除知寧花
縣調歸安升南京戶部主事厯官陝西左布政

使遷太常寺卿有綠滋館集

詩話太常留心國史草成副書藏于家遺稿
為江都汪楫存貯較諸野史頗純正第稍畧
耳詩特餘藝
要非所長

灩澦

孤根夾浪擁江間
百二層巒片石關
急峽倒流三峽水
高灘下指榜頭山
形同牛馬心逾怖
舟近魚龍膽詎殫
聽說風波前更惡
來朝百丈費牽攀

謝肇淛

四十一首

肇淞字在杭長樂人萬厯壬辰進士除湖州推官移東昌遷南京刑部主事調兵部轉工部郎中出為雲南參政升廣西按察使厯左布政使

有小草堂集

李本寧云在抗樂府豐約文質適得其中五古贍而不俳華而不靡

七古音節鮮明氣勢沈鬱五七言律長律比耦精嚴絕句意在筆先韻在言外畚容警策短長合度大都率循古法而中有特造孤詣體無所不變變無所不盡今詩道向衰予將以在杭為砥柱焉張幼于云在杭蓄藻于建安騰聲于度厯希獨于少陵泛駕于長慶兼綜潘陸妙契陶韋其辭究以麗其氣雄以健其摠思優以雋其援事典以則其振嚮和以平既美才情尤深

寄興屠綽真云謝君詩峭蒨秀偉卓然名家王伯穀云在杭詩寄興微而綴詞雅取調古而命意新秀若可餐沃其堪把移如温如以雅以南陸無從云在杭詩冲融婉至深于性情

詩話在杭格不聳高而詩律極細其持論亦平如于鱗元美敬美子與伯玉皆所傾心漫興詩云徐陳里閨久相親鍾李湖湘非吾鄰丸泥久已封幽谷怕見江東一片塵徐指孝廉維和山人與公陳謂文學汝大孝廉幼儒山人振狂是時景陵派已盛行而在杭能距之又云石倉衣鉢自韋陶吳越從風赤幟高若問老夫成底事雪山銀海瀉秋濤此則在杭自任匪淺矣

示湘潼二弟

於戲小子各敬爾守無婦言是用沈湎于酒惟勤無數
惟慎無咎惟德惟厚可以長久往者不可追聊誌爾後
於戲戒之天命不又

發真州別諸子

折板無安蹄風林少寧翼頽波既東徂熹光復西匿行
子逐轉蓬朝盱不遑息擬垂邗江綸仍脂薊門軾仰送
鴻雁翔俯攀楊柳色別緒如絲勞欲言涕沾臆早歲負

好修中道遭反側行止信盈虛風波安終極白璧委精
光何當重拂拭揮手從此辭他鄉復異域贈君以孟勞
持此長相憶

雨霽寄陳隱君

新晴動花氣鳥啼漳水春出門見芳草忽憶山中人種
藥斲雲母煮石炊松薪甲子誰能識空山無四鄰

寒夜感懷

凜凜歲云暮歸鴻浩南征客心渺天末役役哀吾生撫

劍中夜起碧宇何淒清霜氣襲四野素月流前楹寒燈黯欲滅萬籟闕無聲欲奏思歸引淚與朱絲并調孤絃易絕山鬼徘徊鳴浮生無期別離恨何時平

秋日邀龍君御同鍾伯敬林茂之賦詩君御將赴

湟中

營道寡高操大音謝俗機誰云京洛塵而能緇素衣前蹤既云邈後會安可希斗酒自斟酌蟹螯秋正肥南陸有殘暑西山無留暉不知松際月已挂花間扉雜坐忘

聲折緒談聞芬菲君今赴河湟戎馬生郊畿紅顏誰見
賞青雲願多違舊歡意未決新離淚仍揮余亦倦遊者
因之歌式微

桃丘歲暮作

衡門杜俗轄時與參朮親三旬九梳髮不知昏與晨早
來踐繁霜積霰紛成塵白日光慘澹氣色黯不伸始知
玄律窮泰谷無回春歲功忽云改勞生猶艱辛四鄰起
寒杵惻惻傷我神天地固有盡年華安足云

偕李元祉水部游蜀山

一水劃為山兩湖東西匯漕渠貫其中盈盈若衣帶西
湖漸成陸東湖綠無屈千頃碧琉璃風雲互變態中流
一卷石突起砥泐拜金鏡浮芙蓉銀盤捧螺黛荒祠久
零落花穠皆破敗雞柵倚龜趺燕泥凝佛背開尊面南
浦雲水澹相對魚艇散復集鳴榔出深瀨蒲荇交亂流
帆檣遶天外濤驚山影搖波漾日光碎恍如金焦間疑
在蓬壺內憑虛候往還已隔人天界浮雲何時閒勝游

與居會回首空烟波疎鐘隱林靄

十六夜彭城對月

辭家席未煥望舒倏已圓初隱層峰外俄挂高城巔徘徊麗絳闕漱灩澦搖紫淵遠望杳無極忽覺在我前流輝照綺席素波相澄鮮玉宇何淒清孤鴻唳中天寒江抱平楚離離含輕烟美人天一方皓魄私自憐但恐佳辰邁弦望自推遷胡為勞我心愁對江楓眠

安平宋尚書禮祠

文皇既定鼎上國勤灌輸汶流久湮絕負載勞牛車戴
村一以壩分水開龍渠畚鍤不再舉天府盈倉儲誰建
平成烈共城宋尚書挽彼澶漫流盈盈歸尾閭至今會
通河俎豆紛庭除白英獲脩食流慶及餘胥

劉尚書大夏祠

引黃濟汶水譬彼借寇兵龍性不恒馴况乃與之爭百
年罕成績間殫吾山平忠宣纘禹緒四載勞經營上流
既南絕猛勢隨東傾載下淇園竹永奠宣房名蛟鼉徙

窟穴柔櫓多歡聲沉馬不可再寄言塵守成

望點蒼山

點蒼十九峰一一芙蓉青繚亘百餘里疑張雲母屏鳥
道當太白鐵壁排高冥白雲遠其腹玉帶橫萬釘一峰
一溪流奔却如建瓴散入市廛間家家鳴琮琤遠近注
眄隰禾黍藉生成陰崖四五月積雪輝廣庭陽光照不
及力與造化爭北麓產文石玉質聲瓏玲濃澹合畫圖
蒼素何分明追琢豈天巧醞釀誠地靈馮河不可極乖

龍猶潛腥林巒非一狀蘭若勢連蔓相對不數武空翠
盈牕櫺奇境趣自合絕域心所輕悠然獨長嘯忘此支
離形

送練中丞遺裔歸家有序

自金川門之變練公子寧以御史大夫抗節死
闕下闔門荼毒獨有侍媵抱匝歲子匿民間得
免展轉入閩為人傭保六世孫綺者為新寧陳
孝廉掌書記萬曆戊戌孝廉計偕入浙有江右

楊生應祥同舟先一夕生夢練公持刺謁己心
異之比入孝廉船見書記侍側雅哲不羣指問
何姓答曰練生心動叩之曰得非吾里練中丞
後乎綺不應而涕淚滿面生益疑駭窮詰之具
得其狀亟以百金為贈孝廉不受遣綺綺不肯
行曰以死殉國人臣之恒且九族赤矣歸將何
為生益賢之歸家具白當事者以幣來聘授以
衣巾俾奉公祠官為置田廬百畝一時聞者莫

不歎息泣下以為天道有知云

燕山日黑黃塵起金川門外鼓聲死長樂宮為瓦礫場
殿庭流血成海水御史大夫練子寧手持三尺干雷霆
覆巢自分無完卵一門百口歸冥冥事去人亡二百載
蘆荻蕭蕭餘故壘長陵松柏已十圍孤臣遺骨今安在
釣龍臺下水可楫新寧城東山截紫灌園誰能識法章
傭肆猶堪藏李燮一日天迴地轉時千金購出練家兒
若教之鬼終不餒行路聞之皆歔歔我登鍾陵山遙望

石頭城寧為孝孺死不作陳瑛生為君慷慨終一曲悲
風颯颯江波綠

少年行

鎖甲帶明犀輕裝出御隄銀牀調舞馬金距鬪鳴雞酒
向新豐醉花從杜曲迷春寒何處宿楊柳玉樓西

折楊柳

青樓大道傍垂柳復垂楊白馬黃金勒春風何處郎柔
支縈素腕香絮裊啼妝看盡年年別曲終空斷腸

丙申書事

羽檄飛千里天災及兩宮君王聞罪已社稷付談空海
汎乘春急山田望歲空孤舟有嫠婦灑淚五湖東

谷里

谷里三家市仍為暴雨淹逢人無漢語入饌有池鹽溪
釣青鱗小村沽白釀甜亂峰相對晚空翠滿茅檐

十月吳江舟中晚望

年年改歲長為客無奈愁心付酒缸寒鴈背風歸越渚

孤帆帶雨下吳江
黃知霜後柑三寸
白起沙邊鷺一隻
日落洞庭天似水
青山無數入雲牕

送孫子長之泝墅

度支使者權吳關
飽看姑蘇郭外山
稅減任教商舶過
吏稀長對戟門閒
灣中銷夏留僧住
橋上行春載鶴還
西望吳興衣帶水
舊時玉筍已成班

安平署中述懷五十六韻

丘壑元吾好
風塵力未勝
謾言金馬隱
翻作土牛乘
賜

履三河遠封章六郡承幸無官長罵時有簿書仍地重
飛艘集曹閭老吏能抱河城似決臨水署為冰北極通
幽藟南流控魯滕穆陵齊地壯淮甸楚天澄畚鍤冬還
舉杭稔歲屢騰郵籤妨午夢官舫促晨興面目隨人改
文章避世稱寧知貧是病轉覺愛為憎旅食愁新況離
羣憶舊朋彈碁時映竹開卷夜挑燈方外忘年友山中
結夏僧露華紅擘荔冰水綠翻菱逐電青絲騎排雲白
角鷹燕姬春釀壓趙女晚妝凝寶帶鳴條脫銀牀纖氈

薨夢迴香炷篆歌闌月藏稜玉笛吹橫塞珣弧走射棚
鄰多窺宋玉酒或送王弘仗劍經吳苑觀濤過廣陵名
山皆蠟屐絕壑獨擔簦象闕通瑤極燕山應玉繩雲衢
隨地望天路得階升蜩鶯飛將奮駑駘價亦增詞猶慙
色絹宴已預紅綾捧日心常繫從雲氣倍蒸詎知鵷鷺
侶便隔鹿麋層綬忝郎官貴茵均刺史憑分符行郡國
蓬羽後農丞未學操刀割彌深捧玉兢雲霄霜翮勁象
緯綵毫凌但欲深懷瑾何知遠避鰲風雲變蒼狗天地

亂青蠅萋菲終安用蹉跎亦自應積薪甘似汲投杼更
疑曾舉世羞駢指何人問折肱沙蟲吹未了塞馬失何
曾白眼終難變紅顏轉自矜擬拋雞肋去勉就鶴書徵
冀北千金駿圖南六月鵬寒沅河潏潏秋色岱峻嶒北
郭竽長溫東山屐再登無勞沈璧馬祇惜費金繒捷恐
薪垂盡沙防岸善崩桃花無怒浪瓠子有荒塍樓迴隨
雲度亭虛任月昇榜師聲欸乃雉子髮鬚髻蟻穴容周
弁龍門媿李膺全身看奕局守口固緘滕宿鳥知驚彈

傷魚已遠曾鴻心元矯矯蟲羽故翩翩趨舍寧無定升
沉固不恒長歌聊自適休弔剡溪藤

春怨

長信多春草愁中次第生君王行不到漸與玉階平

秋怨

明月憐團扇西風怯綺羅低垂雲母帳不忍見銀河

早行山中

驅車入雲烟連山齊雪色怪禽作鬼啼枯樹如人立

宿吳山寄長安舊人

春時相送出燕都
秋到江南一字無
半夜寒燈數行淚
滿天風雨下西湖

錢唐逢康元龍

黃梅細雨暗江關
我入西吳君欲還
馬上相逢須盡醉
明朝知隔幾重山

聞鐘寄曾人倩

十年去國夢滄浪
夜夜鐘聲似上陽
謾憶長安驅馬伴

東華門外月如霜

鼓山采茶曲

雨前初出半巖香
十萬人家未敢嘗
一自尚方停進貢
年年先納縣官堂

重過分水關

一水中分兩不回
關頭原是望鄉臺
不知客淚能多少
二十年中五度來

雨中度北峽關

溪流屈曲路巉巖
細雨斜風轉不堪
惟有馬頭雲霧裏
青山一片似江南

廬江道中見風沙

四野黃塵欲暮天
行人駐馬淚潸然
自從歸去江南路
不見風沙已一年

入齊界

楚山淮水苦風烟
纔到滕陽又一天
溝外短牆牆外柳
一條官路直如弦

渡汶河

霜飛月落野雞啼
霧鎖長林水拍堤
夾岸人家寒未起
孤舟已過汶河西

田真墓

汶河如帶日西斜
禾黍荒邨四五家
惟有田真墳畔樹
春風猶發紫荊花

淮上重送永奉

輕黃柳色綠烟含
欲折行人自不堪
兩岸梨花寒食雨

孤舟今夜泊淮南

夢作

白鶴屏寒月影稀
水精簾卷篆烟微
生憎柳絮如蝴蝶
撩亂春愁處處飛

春日遡汶河作

東風殘雪繫蘭橈
滿目山川對寂寥
記得門前春水滿
美人蕉壓赤闌橋

舟滯安山

百丈方舟一綫泉待風待閒兩留連客程莫笑蹉跎甚
拙宦何如上水船

葛陽道中雜詩

二首

雨中新水漲平沙芳草連天鳥道斜隔水松門人不閉
斷橋流水紫藤花

烏桕成林稻滿畦新篳白酒配黃雞老農醉卧無人喚
日落子規頭上啼

醴陵

萍鄉西上萬山低路入湘南近五溪日暮東風吹雨急
連天芳草遮鵲啼

桃源道中

春風籬落酒旗閒流水桃花映碧山寄語漁郎莫深去
洞中未必勝人間

平壩

愁雲三月風滿溪一日一程西更西鬼門關外無相識
頭白老鴉朝暮啼

沈朝煥 二首

朝煥字伯含仁和人萬厯壬辰進士除工部主
事調兵部歷員外郎中謫靖州知州升南京刑
部郎中出為四川按察僉事終福建參政有泊

如齋集

陶周望云伯含詩情務已出格由古造
材富故詞博而工神完故氣和而暢

王伯穀云伯含詩才不為法所縛思不為調所
泥龍君御云伯含使君守靖詩多溫厚爾雅
不露牢騷悱惻不平之氣曹能始云伯含詩
體罔不該而才足以達意不斤斤師古法而不
與古
背馳

立秋夜不寐

雨深催病葉不獨井梧飛
侯到蟲先覺燈寒燼漸微
感時難穩卧未老漸知非
枕上驚秋信明朝換客衣

禁馬

可笑東司馬官無一馬騎
自遵臺長約却任吏人嗤
捷足已無路卑棲何處枝
不如歸抱犢隨意隴頭宜

鄧原岳

一首

原岳字汝高閩縣人萬厯壬辰進士除戶部主

事歷員外郎中出為雲南提學僉事終湖廣按察副使有西樓存橐

儀真道中見桃花盛開感而賦之

偏側何偏側行盡江南又江北二月桃花爛漫開
燦若朝霞弄春色今年苦雨花較遲江北不如江南時
但願春風隨轉轂到處花開迎馬足

王樂善 三首

樂善字存初霸州人萬歷壬辰進士除行人改

吏部主事有鶚適軒詩橐扣角集

五渠晚渡

野潦浮平楚扁舟續馬蹄揚鈴風漸緊落日望全迷林
暝漁燈出天空雁陣低叩舷歸意嬾情興屬幽棲

春宮曲

輦路春深細草連妝成空坐百花前昭陽昨夜誰承寵
聞道金錢賜董賢

秋宮曲

一從金殿鎖娉婷
春鳥秋蛩祇自聽
惆悵無心還乞巧
潛來花下拜雙星

袁宏道 二十四首

宏道字無學宗道之弟萬厯壬辰進士除吳縣知縣改京府學官國子博士遷禮部郎調吏部

移病卒于家有錦帆解脫滿碧堂餅花齋華嵩

游草破研齋廣陵桃源敝篋等集

弟小修云錦帆解脫意在

破人執縛間有率意游戲之語或快爽之極浮而不沉情景太真近而不遠要出自性靈足以

蕩滌塵坐學者不察效顰學語其究為俚俗為纖巧為莽蕩烏馬三寫樊有必至非中郎之本旨也 陳卧子云石公才情本自流麗 李舒章云中郎淺俗 繆天自云公安之罪薄于竟陵然啓竟陵者公安也 沈山子云近見有人論詩泚之壞動以何李王李竝舉以愚觀之王可非何李似難輕議袁中郎詩云草昧推何李國雅良足師則中郎亦不專非何李矣

詩話傳有言琴瑟既敝必取而更張之詩文亦然不容不變也陸萬間王李之遺派充塞公安昆弟起而非之以為唐自自古詩不必避體中晚皆有詩不必初盛歐蘇陳黃各有詩不必唐人唐時色澤鮮妍如旦晚脫筆硯者今詩纔脫筆硯已是陳言豈非流自性靈與出自剽擬所從來異乎一時聞者渙然神悟若良藥之解散而沉疴之去體也乃不善學者取其集中俳諧

調笑之語如西湖云一日湖上卧偶見白髮云無端見
一日湖上住一日湖上卧偶見白髮云無端見
白髮欲哭翻成笑自喜笑中意一笑又一跳嚴
陵釣臺云人言漢梅福君之妻父也此本滑稽
之謔類入於狂言不自以為詩者乃錫山華間
修選明詩從而擊賞歎絕是何異棄蘇合之香
取蛭蛻之轉耶予於中郎盡汰其鄙俚
之作存其稍用意者對之可以刮目矣

橫塘渡

橫塘渡郎西來妾東去感郎千金顧妾家住紅橋朱門
十字路認取辛夷花莫過楊柳樹

折楊柳

金史卷六十二
卷六十二
豔陽二三月楊柳枝參差每逢雙燕子憶得別君時憶
得別君時遺君珊瑚枕君行佳麗地何人薦君寢

妾薄命

落花去故條尚有根可依婦人失夫心含情欲告誰燈
光不到明寵極心還變只此雙蛾眉供得幾迴盼看多
自成故未必真衰老譬彼後開花不若初生草

哀殤

弱腕繫金鈴青絲綰偏髻胸前兩繡囊猶作長命字欠

爾三斗乳償汝一升淚
穉魂半尺餘荒荒投旅次
我嘗靜坐思生死同一例子
既先我行即是鬼先輩如彼排
場人尊卑乃相遞一去與一來
孰知非天戲

潞河舟中和小修別詩次韻

小艇烟江雨長堤柿葉霜
一洲魚子市千樹木奴鄉
客去尋空谷書來話酉陽
繁華銷枕上家近呂仙堂

集平山堂用平山字為韻
偕游者方子兩謝生也

大業空遺事披圖咫尺間斜橋興廢水淡墨有無山野
老耕香澤妖狐學黛鬟荒亭猶故井馬上挈泉還

揚州曉泊

薄霧隨風盡寒霜對酒銷
茅魁騰曉市蟹子落歸潮
往事瓊花觀新溝揚子橋
雖然富羅綺未必似前朝

送洪子崖之歸化縣

小邑無官長登臨費履綦
方言從事譯山景隸人知
解舍巢鸚鵡鄉田貢荔枝
嵐光侵簿牘長日但圍綦

夏日泛舟

泛泛鷓鴣近深深雀鷺聞空潭不受暑野竹半捎雲公
子收行蓋佳人曬舞裙垂楊亂荇藻日色冷紛紛

登高有懷

秋菊開誰對寒郊望更新乾坤東逝水車馬北來塵屈
指悲時事停杯憶遠人汀花與岸草何處不傷神

江上

白霧迷荒楚青沅帶遠空沙平晴獻雪樹老夜屯風曠

野眠饑兕孤洲落晚鴻布帆如屋裏何處有城中

學齋留梅子馬

踏盡高槐影青蟲落酒中袖懷三月草衣浣一年塵夢
裏聽朝事杯中覓聖人貧厨非大祭未有肉留賓

別小修

瓜洲雲色蔽天昏腸斷金山寺裏猿狎客也須同海鳥
過江切莫食河豚幕中有主當持牘雪裏無錢且典禪
畫戟如林高丈五不知何處是朱門

託龍君超覓仙源隱居詩以寄之

雲石邨中且卜廬憑君為買一峰餘
全栽芝菊為疆界
盡寫雲嵐入券書門對仙童澆藥地
巷通毛女浣花渠
閒中準擬天台去
好伴劉晨間屋居

送鄒金吾游白下時寓武昌

將軍此日驟征輪
楓葉蕭蕭漢水濱
我已銷魂千里外
那堪重別故鄉人
西風馬度離亭柳
落日衣吹客舍塵
莫向勞勞亭上望
秋江容易得沾巾

辛卯元日

滿城佳氣鬱玄霄
海日如規上海潮
率土再興弘治朔
百年三倍穆宗朝
柳含初綠風前舞
梅帶殘香雪裏飄
笑我疎愚非董子
太平猶頌不鳴條

感事

湘山晴色遠微微
盡日江頭獨醉歸
不見兩關傳露布
尚聞三殿未垂衣
邊愁自古無中下
朝論于今有是非
日暮平沙秋草亂
一雙白鳥避人飛

歸來

歸來兄弟對門居石浦河邊小結廬可比維摩方丈地
不妨揚子一牀書蔬園有處皆添甲花雨無多亦溜渠
野服科頭常聚首阮家禮法向來疎

擬宮詞

玉殿蓮籌夜未央內人傳旨出昭陽朝來剛赴西宮約
莫遣經筵進講章

江上

金匱要略卷六十二
桃花春水滿江頭，獨擁佳人翡翠樓。
誰抱琵琶江口上，聲聲彈出小梁州。

經下邳

諸儒坑盡一身餘，始覺秦家網目疎。
枉把六經灰火底，橋邊猶有未燒書。

羅隱南齋中小集憶舊

珠樓曲曲貯仙娃，一帶風牕十里紗。
記得中和門外路，女牆東去是伊家。

桃花流水引

華陽巾子碧絛環
紫府簾前舊押班
阿母筵頭爭一擲
醉中輸却小蓬山

宿朱仙鎮

祠前簫鼓賽如雲
立石爭劒弔古文
一等英雄含恨死
幾時論定曲將軍

江盈科 一首

盈科字進之常德桃源人萬曆壬辰進士除長

洲知縣擢吏部主事歷官四川提學僉事有雪

濤閣集

袁中郎云進之詩才俊逸爽朗務為新切但有矯枉之過

詩話進之與袁中郎同官吳下其詩頗近公安派持論亦以七子為非特變而不成方者中郎謂其矯枉之過所謂笑他人之未工忘已事之已拙文人通病大抵然矣

讀張魏公傳有感曲壯愍事

子聖焉能蓋父公曲端冤與岳飛同何人為立將軍廟也把烏金鑄魏公

詩話徐秀才善敬可一日語予曰周公謹小人哉張魏公朱子所父事何可毀也予曰公謹三

代直道之遺也。宋之南渡，將帥有人，可以戰，可以守，自寄間外之權于後，喪師動數十萬，元氣重傷，譬諸孱夫，不能復起矣。後於李綱、趙鼎輩，則刻之於汪伯彥、秦檜等，則薦之尚得云好惡之公乎？至曲端之誅，與檜之殺岳飛，何以異而讀史者務曲筆以文致端，有可死之罪，不過因沒，有子講學，沒死微國公為之作狀，天下後世遂信而不疑。爾中郎朱仙鎮詩已極悲惋，不若進之一詩，露膽張目，洵詩家之南董也已。

唐之屏 一首

之屏字君公，松江華亭人，萬曆壬辰進士，除常

山知縣

詩話君公之官常山鄉鄰贈以馬力却之曰常
山斗大縣官便自裝飾苟至三槐九棘更難踵
事增華既而中譏
罷歸養親不復出

登金山

一柱東南表地靈芙蓉萬古插清泠江淮潮色無邊白
楚蜀山光不斷青鯨噏風雷波自撼龍過樓殿雨猶腥
枕流無限滄洲意極目何妨我獨醒

學官上公車遷南京國子監博士

歸里

陳薦夫

二首


薦夫名邦藻以字行更字幼孺閩縣人萬厯甲午舉于鄉有水明樓集

海口城晚望

蒹葭藹藹樹蒼蒼平楚閒看益渺茫
驛路遶山多落木孤城臨水易斜陽
潮迴近浦寒生雨鴈度遙天夜帶霜
暫息征鞍瀛海上烟波千里斷人腸

竹枝詞

荷葉田田柳色垂三船五船多女兒與郎暗約花間去
不唱竹枝知是誰



明詩綜卷六十二